

四庫全書

經部

欽定四庫全書

儀禮集釋卷二十八

宋 李如圭 撰

少牢饋食禮第十六

鄭目錄云諸侯之卿大夫祭其祖禰于廟之禮羊豕
曰少牢少牢于五禮屬吉禮大戴第八小戴第十一
別錄第十六

少牢饋食之禮

鄭注禮將祭祀必先擇牲繫于牢而芻之羊豕曰少

牢諸侯之卿大夫祭宗廟之牲

日用丁巳

鄭注內事用柔日必丁巳者取其令名自丁寧自變
改皆為謹敬必先諏此日明日乃筮

筮旬有一日

鄭注旬十日也以先月下旬之己筮來月上旬之己
筮于廟門之外主人朝服西面于門東史朝服左執筮
右抽上韝兼與筮執之東面受命于主人

鄭注史家臣主筮事者

釋曰主人朝服者服祭服以筮也特牲筮日主人亦服祭時玄端司服職曰享先王則衮冕祭義曰易抱龜南面天子衮冕北面則天子卜祭亦服其祭服雜記大夫士筮宅史練冠長衣以筮筮著也

主人曰孝孫某來日丁亥用薦歲事于皇祖伯某以某妃配某氏尚饗

鄭注丁未必亥也直舉一日以言之耳禘于大廟禮

曰日用丁亥不得丁亥則巳亥辛亥亦用之無則苟有亥馬可也薦進也進歲時之祭事也皇君也伯某其字也大夫或因字為謚春秋傳曰魯無駭卒請謚與族公命以字為展氏是也其仲叔季亦曰仲某叔某季某也某妃某妻也合食曰配某氏若言姜氏子氏也尚庶幾饗歆也

釋曰夏小正曰丁亥萬用入學

案原本訛作萬入大學據大戴禮記改正

丁亥者吉日也筮不同士禮贊命者蓋辟君

史曰諾西面于門西抽下鞢左執筮右兼執鞢以擊筮
鄭注將問吉凶焉故擊之以動其神易曰著之德圓
而神

遂述命曰假爾大筮有常孝孫某來日丁亥用薦歲事
于皇祖伯某以某妃配某氏尚饗

鄭注述循也重以主人辭告筮也假借也言因著之
靈以問之常吉凶之占繇

乃釋鞢立筮

鄭注卿大夫之著長五尺立筮由便

卦者在左坐卦以木卒筮乃書卦于木示主人乃退占
鄭注卦者史之屬也卦以木者每一爻畫地以識之
六爻備書于板史受以示主人退占東面旅占之
釋曰示主人石本上有以字

吉則史贊筮史兼執筮與卦以告于主人占曰從
鄭注從者求吉得吉之言

乃官戒宗人命滌宰命為酒乃退

鄭注官戒戒諸官也當共祭祀事者使之具其物且
齊也滌既濯祭器掃除宗廟

若不吉則及遠日又筮日如初

鄭注及至也遠日後丁若後己

宿

鄭注宿讀為肅肅進也大夫尊儀益多筮日既戒諸

官以齋戒矣祭矣令注疏本訛作也至前祭一日又戒以進之

使知祭日當來古文宿皆作羞

釋曰申戒為宿宿諸官宜在宿尸之後宿尸之夕為期則宿前于祭一日

前宿一日宿戒尸

鄭注皆肅諸官之日又先肅尸者重所用為尸者又為將筮

明日朝筮尸如筮日之儀

案儀唐石經及原本皆作禮從今注疏本

命曰孝

孫某來日丁亥用薦歲事于皇祖伯某以某妃配某氏以某之某為尸尚饗筮卦占如初

鄭注某之某者字尸父而名尸也字尸父尊鬼神也
不前期三日筮尸者大夫下人君祭之朝乃視濯與
士異

釋曰周禮大宰享先王則掌百官之誓戒前期十日
帥執事而卜日遂戒祭統曰散齋三日以定之致齋
三日以齋之先期旬有一日宮宰宿夫人夫人亦散
齋七日致齋三日則天子諸侯前祭十日卜日而戒
諸官散齋前期三日致齋士卑亦前期三日筮尸不

嫌與人君同惟不得散齋七日耳大夫不敢同君散齋九日前祭一日乃筮尸而致齋

吉則乃遂宿尸祝擯

鄭注筮吉又遂肅尸重尸也既肅尸乃肅諸官及執事者祝為擯者尸神象

主人再拜稽首祝告曰孝孫某來日丁亥用薦歲事于皇祖伯某以某妃配某氏敢宿

鄭注告尸以主人為此事來肅

案今注疏本脫肅字

尸拜許諾主人又再拜稽首主人退尸送揖不拜

鄭注尸不拜者尸尊

釋曰祝釋辭尸乃拜異于士

若不吉則遂改筮尸

鄭注即改筮之不及遠日

既宿尸反為期于廂門之外

鄭注為期肅諸官而皆至定祭早晏之期為期亦夕
時也言既肅尸反為期明大夫尊肅尸而已其為賓

及執事者使人肅之

釋曰特牲饋食禮親宿賓

主人門東南面宗人朝服北面曰請祭期主人曰比于

子

鄭注比次早晏在于子也主人不西面者大夫尊于

諸官有君道也為期亦惟尸不來也

宗人曰旦明行事主人曰諾乃退

鄭注旦明旦日質明

釋曰周禮雞人凡國事為期則告之時時謂此旦明之時

明日主人朝服即位于廟門之外東方南面宰宗人西面北上牲北首東上司馬刲羊司士擊豕宗人告備乃退

鄭注刲擊皆謂殺之此實既省告備乃殺之文互者

省也

案今注疏本
作省文也

尚書傳曰

案今注疏
本脫曰字

羊屬火豕屬

水

雍人概鼎匕俎于雍爨雍爨在門東南北上

鄭注雍人掌割烹之事者爨竈也在門東南統于主人北上羊豕魚腊皆有竈竈西有鑊凡概者皆陳之而後告絜

廩人概甑甗匕與敦于廩爨廩爨在雍爨之北

鄭注廩人掌米入之藏者甗如甑一孔匕所以匕黍稷者也古文甗為烝

釋曰甗無底甗也

司宮概豆籩勺爵觚解几洗篚于東堂下勺爵觚解實于篚卒概饌豆籩與篚于房中放于西方設洗于阼階東南當東榮

鄭注放猶依也大夫攝官司宮兼掌祭器者也

羹定雍人陳鼎五三鼎在羊鑊之西二鼎在豕鑊之西鄭注魚腊從羊膚從豕統于牲

司馬升羊右脾髀不升肩臂臑膊脰正脊一脰脊一橫脊一短脅一正脅一代脅一皆二骨以並腸三胃三舉肺

一祭肺三實于一鼎

鄭注升猶上也上右腓周所貴也髀不升近竅賤也
肩臂臑肱骨膊胛股骨脊從前為正脅旁中為正脊
先前脅先後屈而反猶器之縵也並併也脊脅骨多
六體各取二骨併之以多為貴舉肺一尸食所先舉
也祭肺三為尸主人主婦古文腓皆作辯髀皆作脾
今文並皆為併

釋曰肩至代脅凡十一體脊脅言一見其體言二以

竝見其骨腸胃各三蓋取脊脅之數尸主人主婦各

取神

案此下
原本缺

司士升豕右胖髀不升肩臂臑膊脰正脊一脰脊一橫
脊一短脅一正脅一代脅一皆二骨以竝舉肺一祭肺
三實於一鼎

鄭注豕無腸胃君子不食囷腴

釋曰養牛羊曰芻犬豕曰豢豢亦作溷犬豕食米穀
腸胃有似人穢

雍人倫膚九實於一鼎

鄭注倫擇也膚脅革肉擇之取美者

釋曰膚豕肉也

司士又升魚腊魚十有五而鼎腊一純而鼎腊用麋

鄭注司士又升副倅者合升左右胖曰純純猶全也

釋曰升鼎同時下經云司士三人升魚腊膚

卒脅皆設扃竈乃舉陳鼎于廂門之外東方北面北上

鄭注北面北上鄉內相隨古文竈皆為密

司宮尊兩甌于房戶之間同於皆有冪

冪冪各本記作冪據唐石經改

正甌有玄酒

鄭注房戶之間房西室戶東也於無足禁者酒戒也
大夫去足改名優尊者若不為之戒然古文甌皆作

廡今文冪作冪

司宮設壘水于洗東有料設篚于洗西南肆

鄭注料料水器也凡設水用壘沃盥用料禮在此也
改饌豆籩于房中南面如饋之設實豆籩之實

鄭注改更也為實之更之威儀多也如饋之設如其
陳之左右也饋設東面

釋曰如設于輿時

小祝設槃匱與篋巾於西階東

鄭注為尸將盥

主人朝服即位于阼階東西面

鄭注為將祭也

司宮筵于輿祝設几于筵上右之

鄭注布陳神坐也室中西南隅謂之奧席東面近南
為右

主人出迎鼎除霏士盥舉鼎主人先入

鄭注道之也主人不盥不舉

司宮取二勺于篚洗之兼執以升乃啓二尊之蓋霏奠
于楹上加二勺于二尊覆之南柄

鄭注二尊兩甌也今文啓為開古文柄皆為枋

案今注疏

本脫啓為開古
文皆共六字

釋曰玄酒亦有勺重古如酌者然

鼎序入雍正執一匕以從雍府執四匕以從司士合執
二俎以從司士贊者二人皆合執二俎以相從入

鄭注相助

釋曰雍正雍官之長府其屬也鼎一匕二俎正俎五
與所俎而六

陳鼎于東方當序南于洗西皆西面北上膚為下匕皆
加于鼎東枋

鄭注膚為下以其加也南于洗西陳于洗西南

釋曰榮在序外鼎當序洗當榮膚升鼎先魚脂從其牲陳之在下如其次

俎皆設于鼎西西肆所俎在羊俎之北亦西肆

鄭注所俎在北將先載也異其設文不當鼎
釋曰所俎不言在羊鼎西知不當鼎

宗人遣賓就主人皆盥于洗長杜

鄭注長杜者長賓先次賓後也主人不杜言就主人

者明親臨之古文杜作匕

釋曰此臣也而曰賓者祭以得賓客之助為榮也禮運曰仲尼與於蜡賓

佐食上利升牢心舌載于胙俎心皆安下切上午割勿沒其載于胙俎末在上舌皆切本末亦午割勿沒其載于胙橫之皆如初為之于爨也

鄭注牢羊豕也安平也平割其下于載便也凡割本末食必正也午割使可絕也

案今注疏本脫也字

勿沒為其分

散也所之為言敬也所以敬尸也周禮祭尚肺事尸尚心舌心舌知滋味今文切皆為刲

釋曰凡言宰者羊豕具有也午割從橫割之勿沒不絕其中央少許在爨制之已然特牲饋食禮曰所俎心舌皆去本末午割之實于牲鼎載心立舌縮俎論語曰割不正不食

佐食遷所俎於阼階西西縮乃反佐食二人上利升羊載右胖髀不升肩臂臠膊骼正脊一脰脊一橫脊一短

脅一正脅一代脅一皆二骨以竝腸三胃三長皆及俎
拒舉肺一長終肺祭肺三皆切肩臂臑膊髀在兩端脊
脅肺肩在上

鄭注升之以尊卑載之以體次各有宜也拒讀為介
距之距俎距脛中當橫節也凡牲體之數及載備于
此

釋曰俎距謂中俎足為橫距猶雞距也凡牲體前脛
骨三肩臂臑也後脛骨三膊髀也脊骨三正脊脰

脊橫脊也脅骨三代脅長脅短脅也膊之

案此下
原本缺

下利升豕其載如羊無腸胃體其載于俎皆進下

鄭注進下變于食生也所以交于神明不敢以食道
敬之至也鄉飲酒禮進腍羊次其體豕言進下互相
見

釋曰骨有本末進腍進本也進下進末也

司士三人升魚腊膚魚用鮒十有五而俎縮載右首進

腍

鄭注右首進腴亦變于食生也有司載魚橫之少儀
曰羞濡魚者進尾

釋曰凡載魚皆右首食生則寢右而進髻下篇賓尸
魚橫于人為縮蓋進其尾也又與此正祭異

腊一純而俎亦進下肩在上

鄭注如羊豕凡腊之體載禮在此

膚九而俎亦橫載革順

鄭注列載于俎令其皮相順亦者亦其骨體

釋曰牲體進下則俎亦橫載于此互見之

卒脅祝盥于洗升自西階主人盥升自阼階祝先入南面主人從戶內西面

鄭注將納祭也

主婦被錫衣侈袂薦自東房韭菹醢醢坐奠于筵前婦贊者一人亦被錫衣侈袂執葵菹羸醢以授主婦主婦不興遂受陪設于東韭菹在南葵菹在北主婦興入于房

鄭注被錫讀為髮鬢古者或剔賤者刑者之髮以被婦人之紒為飾因名髮鬢焉此周禮所謂次也不纒笄者大夫妻尊亦衣綃衣而侈其袂耳侈者蓋半士妻之袂以益之衣三尺三寸袂尺八寸韭菹醢醢朝事之豆也而饋食用之豐大夫禮葵菹在此縉今文錫為錫羸為蝸

釋曰追師有次次第髮之長短為之亦見士昏禮婦贊者一人亦被錫衣侈袂則其餘如士之妻纒笄宵

衣耳士妻與助祭婦人同宵衣無異服者禮窮則同
故也袂袖也祛袂口也士妻之袂二尺二寸祛尺二
寸朝事薦血腥之事也周禮醢人朝事八豆有韭菹
醢醢饋食八豆有葵菹羸醢士饋食禮惟取葵菹羸
醢豐大夫禮故兼取朝事二豆豆皆右菹左醢而此
葵菹在北者與韭菹爭設之采蘋詩曰于以奠之宗
室牖下王肅以為大夫妻助祭采蘋藻以為菹設之
于與與即牖下朝士當作朝事

禮記卷之八十八
卷二十八
一
佐食上利執羊俎下利執豕俎司士三人執魚腊膚俎
序升自西階相從入設俎羊在豆東豕亞其北魚在羊
東腊在豕東特膚當俎北端

鄭注相助也

主婦自東房執一金敦黍有蓋坐設于羊俎之南婦贊
者執敦稷以授主婦主婦興受坐設于魚俎南又興受
贊者敦黍坐設于稷南又興受贊者敦稷坐設于黍南
敦皆南首主婦興入于房

鄭注敦有首者尊者器飾也飾蓋象龜周之禮飾器各以其類龜有上下甲今文曰主婦入于房

祝酌奠遂命佐食啓會佐食啓會蓋二以重設于敦南鄭注酌奠酌酒為神奠之後酌者酒尊要成也特牲饋食禮曰祝洗酌奠奠于銅南重累之

釋曰饌由尊者而成故酒後設之下經銅設于韭道之南此時銅未設故奠處亦空其文

主人西面祝在左主人再拜稽首祝祝曰孝孫某敢用

柔毛剛鬣嘉薦普淖用薦歲事于皇祖伯某以某妃配
某氏尚饗主人又再拜稽首

鄭注羊曰柔毛豕曰剛鬣嘉薦菹醢也普淖黍稷也
晉大也淖和也德能大和乃有黍稷春秋傳曰秦粢
以告曰潔粢豐盛謂其三時不害而民和年豐也

釋曰曾子問曰宗子為士庶子為大夫其祭也如之
何孔子曰以上牲祭于宗子之家祝曰孝子某為介
子某薦其常事若宗子有罪居于他國庶子為大夫

其祭也祝曰孝子某使介子某執其常事羊肥則毛
柔豕肥則鬣剛盛音成

祝出迎尸于廟門之外主人降立于阼階東西面祝先
入門右尸入門左

鄭注主人不出迎尸伸尊也特牲饋食禮曰尸入主
人及賓皆辟位出亦如之祝入門右者辟尸盥也既
則後尸

釋曰不迎尸伸尸之尊

宗人奉槃東面于庭南一宗人奉匱水西面于槃東一宗人奉簞巾南面于槃北乃沃尸盥于槃上卒盥坐奠簞取巾興振之三以授尸坐取簞興以受尸巾

鄭注庭南沒雷

釋曰尸盥設于西階東尸入門左至門內雷侍盥者奉器就之門內雷在庭之南特牲饋食禮曰尸入門左北面盥亦繼門言之

祝延尸尸升自西階入祝從

鄭注由後詔相之曰延延進也周禮曰大祝相尸禮
祝從從尸升自西階

主人升自阼階祝先入主人從

鄭注祝接神先入宜也

尸升筵祝主人西面立于戶內祝在左

鄭注主人由祝後而居右尊也祝從尸尸即席乃卻
居主人左

祝主人皆拜妥尸尸不言尸荅拜遂坐

鄭注拜安尸拜之使安坐也尸自此荅拜遂坐而卒
食其間有不啐奠不當劔不告旨大夫之禮尸彌尊
也不告旨者為初亦不饗所謂曲而殺

釋曰不當劔不當豕劔也不饗祝不釋勸強之辭蓋
辟人君

祝反南面

鄭注未有事也隋祭爾教

案隋各本訛作墮
下同據釋文改正

官各肅

其職不命

尸取韭菹辯換于三豆祭于豆間上佐食取黍稷于四
敦下佐食取牢一切肺于俎以授上佐食上佐食兼與
黍以授尸尸受同祭于豆祭

鄭注牢羊豕也同合也合祭于俎豆之祭也黍稷之
祭為隋祭將食神餘尊之而祭之今文辯為徧

釋曰切肺祭肺也神俎祭肺二取其一也言牢者羊
豕兼取之俎豆當作菹豆

上佐食舉尸牢肺正脊以授尸上佐食爾上敦黍于筵

上右之

鄭注爾近也或曰移也右之便尸食也重言上佐食明更起不相因

釋曰牢肺離肺也授尸下賈氏有尸受祭肺四字不設大羹者大羹為尸不為神賓尸乃有之

主人羞所俎升自阼階直于膚北

祭直各本訛作置據釋文改正

鄭注羞進也所敬也親進之主人敬尸之加

上佐食羞兩鬮取一羊鬮于房中坐設于韭菹之南下

佐食又取一豕劘于房中以從上佐食受坐設于羊劘之南皆芼皆有柶尸扱以柶祭羊劘遂以祭豕劘嘗羊劘

鄭注芼菜也羊用苦豕用薇皆有滑

釋曰苦薇滑見公食記

食舉

鄭注舉牢肺正春也先食啗之以為道也

三飯

鄭注食以黍

釋曰飯扶晚切下同

上佐食舉尸牢幹尸受振祭濟之佐食受加于斝

鄭注幹正脅也古文幹為肝

上佐食羞載兩瓦豆有醢亦用瓦豆設于薦豆之北

鄭注設于薦豆之北以其加也四豆亦縉羊載在南

豕載在北無臠臠者尚牲不尚味

釋曰縉者羊載北醢醢東豕載載南醢

尸又食食載上佐食舉尸一魚尸受振祭濟之佐食受加于所橫之

鄭注又復也或言食或言飯食大名小數曰飯魚橫之者異于肉

釋曰魚縮俎今則橫之牲橫載加于所其縮之與

又食上佐食舉尸腊肩尸受振祭濟之上佐食受加于所

鄭注腊魚皆一舉者少牢二牲略之腊必舉肩以肩

為終也別舉魚腊崇威儀

釋曰特牲魚腊皆竝時三舉肩尊牲體亦後舉之

又食上佐食舉尸牢骼如初

鄭注如舉幹也

又食

鄭注不舉者卿大夫之禮不過五舉須侑尸

尸告飽祝西面于主人之南獨侑不拜侑曰皇尸未實

侑

鄭注侑勸也祝獨勸者更則尸飽實猶飽也祝既侑復反南面

尸又食上佐食舉尸牢肩尸受振祭濟之佐食受加于所

鄭注四舉牢體始于正春終于肩尊于終始尸不飯告飽祝西面于主人之南

鄭注祝當贊主人辭

主人不言拜侑

鄭注祝言而不拜主人不言而拜親疏之宜

釋曰周禮大祝辨九拜以享侑祭祀

尸又三飯

鄭注為祝一飯為主人三飯尊卑之差凡十一飯

案凡

今注疏本
訛作尸 下人君也

釋曰下尸稼切

上佐食受尸牢肺正脊加于所

鄭注言受者尸授之也尸受牢幹而實舉于菹豆食

畢操以授佐食焉

釋曰菹豆韭菹之豆

主人降洗爵升北面酌酒乃酌尸尸拜受主人拜送

鄭注酌猶羨也既食之而又飲之所以樂之古文酌作酌

尸祭酒啐酒賓長羞牢肝用俎縮執俎肝亦縮進末鹽在右

鄭注羞進也縮從也鹽在肝右便尸換之古文縮為

感

釋曰鹽在右據賓長西面設者而言于尸為鹽在左
右取肝鄉左換之

尸左執爵右兼取肝換于俎鹽振祭濟之加于菹豆卒
爵主人拜祝受尸爵尸荅拜

鄭注兼兼羊豕

釋曰少儀曰其有折俎者取祭反之不坐燔亦如之
尸則坐

祝酌授尸尸酢主人主人拜受爵尸荅拜主人西面奠爵又拜

鄭注主人受酢酒俠爵拜彌尊尸

上佐食取四敦黍稷下佐食取牢一切肺以授上佐食上佐食以綏祭

鄭注綏或作接接讀為墮將受嘏亦尊尸餘而祭之

古文綏為斝

案綏各本訛作墮據經云以綏祭又後注云綏亦當作接古文為斝可證此墮

字乃綏之訛

主人左執爵右受佐食坐祭之又祭酒不興遂啐酒

鄭注右受佐食右手受墮于佐食也至此言坐祭之者明尸與主人為禮也尸恒坐有事則起主人恒立有事則坐

祝與二佐食皆出盥于洗入二佐食各取黍于一敦上佐食兼受搏之以授尸尸執以命祝

鄭注命祝以嘏辭

卒命祝祝受以東北面于戶西以嘏于主人曰皇尸命

工祝承致多福無疆于汝孝孫來汝孝孫使女受祿于天宜稼于田着壽萬年勿替引之

鄭注嘏大也予主人以大福工官也承猶傳也來讀曰釐釐賜也耕種曰稼勿猶無也替廢也引長也言無廢止時長如是也古文嘏為格祿為福着為微替為袂袂或為戔戔替聲相近

釋曰詩天保曰吉蠲為饗是用孝享禴祠烝嘗于公先王君曰卜爾萬壽無疆楚茨曰工祝致告徂賚孝

孫苾芬孝祀神嗜飲食卜爾百福如幾如式既齊既稷既匡既勅永錫爾極時萬時億卜予也此皆序嘏主人之辭

主人坐奠爵興再拜稽首興受黍坐振祭齊之詩懷之實于左袂挂于季指執爵以興坐卒爵執爵以興坐奠爵拜尸荅拜執爵以興出宰夫以籩受黍主人嘗之納諸內

鄭注詩猶承也實于左袂便右手也季猶小也出出

戶也宰夫掌飲食之事者收斂曰嗇明豐年乃有黍稷也復嘗之者重之至也納猶入也古文挂作卦

主人獻祝設席南面祝拜于席上坐受

鄭注室中迫狹

釋曰亦變于尸

主人西面荅拜

鄭注不言拜送下尸

釋曰下戶稼切後下尸同

金匱要略卷之八
卷二十八
薦兩豆菹醢

鄭注葵菹羸醢

佐食設俎牢髀橫脊一短脅一腸一胃一膚三魚一橫
之腊兩髀屬于尻

鄭注皆升下體祝賤也魚橫者四物共俎殊之也腊
兩髀屬于尻尤賤不殊

釋曰髀橫脊短脅皆下體也四物羊豕魚腊腊升左
右胖故尻在兩髀中連屬之

祝取菹煗于醢祭于豆間祝祭俎

鄭注大夫祝俎無肺祭用膚遠下尸不齊之膚不盛
釋曰大夫尸尊祝無祭肺又無離肺其祭用膚與餒
者同耳

祭酒啐酒肝牢從祝取肝煗于鹽振祭齊之不興加于
俎卒爵興

鄭注亦如佐食授爵乃興不拜既爵大夫祝賤也

主人酌獻上佐食上佐食戶內牖東北面拜坐受爵主

人西面答拜佐食祭酒卒爵拜坐授爵興

鄭注不啐而卒爵者大夫之佐食賤禮略

釋曰授石本作受

俎設于兩階之間其俎折一膚

鄭注佐食不得成禮于室中折者擇取牢正體餘骨
折分用之有脊而無薦亦遠下尸

釋曰無肺又無菹醢

主人又獻下佐食亦如之其脊亦設于階間西上亦折

一膚

鄭注上佐食既獻則出就其俎特牲記曰佐食無事則中庭北面謂此時

有司贊者取爵于篚以升授主婦贊者于房戶

鄭注男女不相因特牲饋食禮曰佐食卒角主人受角降反于篚

婦贊者受以授主婦主婦洗于房中出酌入戶西面拜獻尸

鄭注入戶西面拜由便也不北面者辟人君夫人也
拜而後獻者當俠拜也昏禮曰婦洗在北堂直室東
隅

釋曰特牲主婦北面拜凡大夫所辟者士多得與君
同卑不嫌也

尸拜受主婦主人之北西面拜送爵

鄭注拜于主人之北西面婦人位在內此拜于北則

上拜于南矣

案此今注疏本
訛作也脫矣字

由便也

尸祭酒卒爵主婦拜祝受尸爵尸荅拜易爵洗酌授尸
鄭注祝出易爵男女不同爵

主婦拜受爵尸荅拜上佐食綏祭主婦西面于主人之
北受祭祭之其綏祭如主人之禮不嘏卒爵拜尸荅拜
鄭注不嘏夫婦一體綏亦當作接古文爲所

主婦以爵出贊者受易爵于篚以授主婦于房中

鄭注贊者有司贊者也易爵亦以授婦贊者婦贊者
受房戶外入授主婦

主婦洗酌獻祝祝拜坐受爵主婦荅拜于主人之北卒爵不興坐授主婦

鄭注不俛拜下尸也今文曰祝拜受

主婦受酌獻上佐食于戶內佐食北面拜坐受爵主婦西面荅拜祭酒卒爵坐授主婦主婦獻下佐食亦如之主婦受爵以入于房

鄭注不言拜于主人之北可知也爵奠于內篚

賓長洗爵獻于尸尸拜受爵賓戶西北面拜送爵尸祭

酒卒爵賓拜祝受尸爵尸荅拜祝酌授尸賓拜受爵尸
拜送爵賓坐奠爵遂拜執爵以興坐祭遂飲卒爵執爵
以興坐奠爵拜尸荅拜賓酌獻祝祝拜坐受爵賓北面
荅拜祝祭酒啐酒奠爵于其筵前

鄭注啐酒而不啐爵祭事畢示醉也不獻佐食將儗
尸禮殺

釋曰啐爵當作卒爵

主人出立于阼階上西面祝出立于西階上東面祝告

曰利成

鄭注利猶養也成畢也孝子之養禮畢

釋曰特牲饋食禮戶外告利成此禮于階上尊者彌

遠于尸

祝入尸謾主人降立于阼階東西面

鄭注謾起也謾或作休

祝先尸從遂出于廟門

鄭注事尸之禮訖于廟門外

釋曰尸在廟門外則疑于臣故送逆尸皆以廟門為

斷

祝反復位于室中主人亦入于室復位祝命佐食徹所
俎降設于堂下阼階南

鄭注徹所俎不出門將儻尸也所俎而以儻尸者其
本為不反魚肉耳不云尸俎未歸尸

釋曰特牲饋食禮佐食徹尸俎出于廟門即此所俎
司宮設對席乃四人暮

鄭注大夫禮四人餽

案餽今注
疏本作饗

明惠大也

上佐食盥升下佐食對之賓長二人備

鄭注備四人餽也三餽亦盥升

釋曰上佐食坐尸之處

司士進一敦黍于上佐食又進一敦黍于下佐食皆右
之于席上

鄭注右之者東面在南西面在北

資黍于羊俎兩端兩下是餽

鄭注資猶減也減置于羊俎兩端則一賓長在上佐食之北一賓長在下佐食之南今文資作齋

釋曰餽當如上下文作養

司士乃辯舉養者皆祭黍祭舉

鄭注舉舉膚今文辯為徧

主人西面三拜養者養者奠舉于俎皆荅拜皆反取舉鄭注三拜旅之示徧也言反者拜時或去其席在東面席者東面拜在西面席者皆南面拜

釋曰在西面者與主人同面故南面拜

司士進一鉶于上養又進一鉶于次養又進二豆滫于兩下乃皆食食舉

鄭注滫肉汁也

釋曰神坐止有羊豕二鉶故兩下進滫也皆食食黍也食舉食膚

卒食主人洗一爵升酌以授上養贊者洗三爵酌主人受于戶內以授次養若是以辯皆不拜受爵主人西面

三拜養者養者奠爵皆答拜皆祭酒卒爵奠爵皆拜主

人答壹拜

案壹今注疏
本訛作一

鄭注不拜受爵者大夫餒者賤也答壹拜略也古文壹為一也

釋曰周禮九拜有奇拜謂一拜也答臣下之拜

養者三人興出

鄭注出降實爵于篚反賓位

上養止主人受上養爵酌以醋于戶內西面坐奠爵拜

上養荅拜坐祭酒啐酒

鄭注主人自醋者上養獨止當尸位尊不酌也

止養親嘏曰主人受祭之福胡壽保建家室

鄭注親嘏不使祝授之亦以黍

主人興坐奠爵拜執爵以興坐卒爵拜上養荅拜上養興出主人送乃退

鄭注送佐食不拜賤

欽定四庫全書

經部

儀禮集釋卷二十九

二十九

詳校官監察御史臣曹坦

侍讀臣孫球覆勘

膳錄監生臣嵇承羣

膳錄監生臣張曾壇

欽定四庫全書

儀禮集釋卷二十九

宋 李如圭 撰

有司徹第十七

鄭目錄云少牢之下篇也上大夫既祭儻尸于堂之禮若下大夫祭畢禮尸于室中無別行儻尸于堂之事天子諸侯之祭明日而繹有司徹于五禮屬吉禮

案合注疏
本脫禮字

大戴第九小戴第十二別錄少牢下篇第

十七

有司徹

鄭注徹室中之饋及祝佐食之俎卿大夫既祭而饋尸禮崇也饋尸則不設饌西北隅以此薦俎之陳有祭象而亦足以厭飫神天子諸侯明日祭于祊而繹春秋傳曰辛巳有事于大廟仲遂卒于垂壬午猶繹是也爾雅曰繹又祭也

埽堂

鄭注為饋尸新之少儀曰汎埽曰埽埽席前曰拊

司宮攝酒

鄭注更洗盞整頓之今文攝為聶

乃燹尸俎

鄭注燹溫也溫尸俎于爨所亦溫焉獨言溫尸俎則
祝與佐食不與儻尸之禮古文燹皆作尋記或作燂
春秋傳曰若可燂也亦可寒也

釋曰燹說文曰于湯中爇肉也尸俎神俎也尸所舉
肩髀加于所者下皆復載于俎知所俎亦燹

卒餗乃升羊豕魚三鼎無腊與膚乃設扃鼐陳鼎于門外如初

鄭注腊為庶羞膚從豕去其鼎者儻尸之禮殺于初如初者如廟門之外東方北面上今文扃為鉉古文鼐為密

乃議侑于賓以異姓

鄭注議猶擇也擇賓之賢者可以侑尸必用異姓廣敬也是時主人及賓有司已復內位古文侑皆作宥

宗人戒侑

鄭注戒猶告也南面告于其位戒曰請子為侑

侑出俟于廟門之外

鄭注俟待也待于外當與尸更入主人興禮事尸極
敬心也

司宮筵于戶西南面

鄭注為尸席也

又筵于西序東面

鄭注為侑席也

釋曰尸侑席位與鄉飲酒賓介之位同

尸與侑北面于廟門之外西上

鄭注言與殊尊卑北面者賓尸而尸益卑西上統于賓客

主人出迎尸宗人擯

鄭注賓客尸而迎之主人益尊擯贊

釋曰鄉者祝擯尸神象今宗人擯賓尸也

主人拜尸荅拜主人又拜侑侑荅拜主人揖先入門右
鄭注道尸

尸入門左侑從亦左揖乃讓

鄭注沒雷相揖至階又讓

釋曰沒雷至門內雷

主人先升自阼階尸侑升自西階西楹西北面東上

鄭注東上統于其席

釋曰異于門外西上也戶西之席東上侑席亦西于

尸席

主人東楹東北面拜至尸荅拜主人又拜侑侑荅拜

鄭注拜至喜之

乃舉

鄭注舉舉鼎也舉者不盥殺也

司馬舉羊鼎司士舉豕鼎舉魚鼎以入陳鼎如初

鄭注如初如阼階下西面北上

雍正執一匕以從雍府執二匕以從司士合執二俎以

從司士贊者亦合執二俎以從匕皆加于鼎東枋二俎設于羊鼎西西縮二俎皆設于二鼎西亦西縮

鄭注雍正羣吏掌辨體名肉物者府其屬凡三七鼎一匕四俎為尸侑主人主婦其二俎設于豕鼎魚鼎之西陳之宜具也古文縮皆為威

釋曰四俎皆載羊體之正俎而分陳二鼎西者欲使鼎具有俎

雍人合執二俎陳于羊俎西竝皆西縮覆二疏匕于其

上皆縮俎兩枋

鄭注竝併也其南俎司馬以羞羊匕滂羊肉滂其北
俎司士以羞豕匕滂豕肉滂豕脊滂魚䟽匕匕柄有
刻飾者古文竝皆作併

釋曰二俎上有匕知以羞匕滂既則以羞羊肉滂豕
脊下經羊肉滂載于南俎匕滂皆次賓羞之侑魚滂
司馬羞之而槩云司馬司士者因司馬刲羊司士擊
豕而統言之䟽者䟽通刻飾之名明堂有䟽屏豕肉

清三字衍即豕脊也

主人降受宰几尸侑降主人辭尸對

鄭注几所以坐安體周禮大宰掌贊玉几玉爵

宰授几主人受二手橫執几揖尸

鄭注獨揖尸几禮主于尸

主人升尸侑升復位

鄭注位阼階賓階上位

主人西面左手執几縮之以右袂推拂几三二手橫執

几進授尸于筵前

鄭注衣袖謂之袂

案此下今注疏本有推拂去塵示拂者外拂之也六字

新

尸進二手受于手閒

鄭注受從手閒謙也

主人退尸還几縮之右手執外廉北面奠于筵上左之南縮不坐

鄭注左之者異于鬼神生人陽長左鬼神陰長右不

坐奠之者几輕

主人東楹東北面拜

鄭注拜送几也

尸復位尸與侑皆北面答拜

鄭注侑拜者從于尸

主人降洗尸侑降尸辭洗主人對卒洗揖主人升尸侑
升尸西楹西北面拜洗主人東楹東北面奠爵答拜降
盥尸侑降主人辭尸對卒盥主人揖升尸侑升主人坐

取爵酌獻尸尸北面拜受爵主人東楹東北面拜送爵
鄭注降盟者為土污手不可酌

主婦自東房薦韭菹醢坐奠于筵前菹在西方婦贊者
執昌菹醢以授主婦主婦不興受陪設于南昌在東方
興取籩于房麩黃坐設于豆西當外列麩在東方婦贊
者執白黑以授主婦主婦不興受設于初籩之南白在
西方興退

鄭注昌昌本也韭菹醢昌本麩麩麩熬麥也黃熬

臬實也白熬稻黑熬黍此皆朝事之豆籩大夫無朝事而用之儻尸亦豐大夫之禮主婦取籩興者以饌異親之當外列辟鉶也退退入房也

釋曰先獻後薦異于祭也陪設重列之也籩人掌朝事之籩其實麩黃白黑醢人掌朝事之豆其實韭菹醢醢昌本麩麩凡無骨為醢有骨為麩當外列麩在昌菹西韭菹西以俟亞獻設鉶

乃升

鄭注升牲體于俎也

司馬牝羊亦司馬載載右體肩臂肫髀膾正脊一脰脊
一橫脊一短脅一正脅一代脅一腸一胃一祭肺一載
於一俎

鄭注言燔尸俎復序體者明所舉肩髀存焉亦著脊
脅皆一骨也膾在下者折分之以為肉清賤也

案賤
今注

疏本訛
作俎

一俎謂司士所設羊鼎西第一俎

釋曰此尸之羊正俎也復肩髀于俎與正祭神俎同

其異者脊脅腸胃祭肺皆一又無舉肺且折分其膈
故降膈在骼下第一俎謂羊鼎西之南俎羊肉滑俎
在豕俎之南知尸俎亦在侑俎南

羊肉滑膈折正脊一正脅一腸一胃一膾肺一載于南
俎

鄭注肉滑肉在汁中者以增俎實為尸加也必為膈
折上所折分者膾肺離肺也南俎雍人所設在南者
此以下十一俎俟時而載于此歷說之爾今文滑為

汁

釋曰此羊加俎也以肉初在清中故異其名曰羊肉
清膍折折分正俎之膍也凡祭肺切之膍肺離之祭
肺祭而不齎膍肺膍而亦祭祭肺尊故加俎用膍肺
祭肺又名切肺剗肺膍肺又名離肺舉肺南俎羊俎
西之南俎尸羊俎以下凡十二俎其四俎尸侑主人
主婦之正俎餘八俎以雍人所設二俎往還載之
司士杜豕亦司士載亦右體肩臂肫骼膍正脊一脰脊

一橫脊一短脅一正脅一代脅一膚五臍肺一載于一俎

鄭注臠在下者順羊也俎謂雍人所設在北者

釋曰此豕脊也豕無正俎不折臠臠亦在下順上文也

侑俎羊左肩左肫正脊一脅一腸一胃一切肺一載于一俎
侑俎豕左肩折正脊一脅一膚三切肺一載于一

俎

鄭注侑俎用左體侑賤其羊俎過三體有肫尊之加也豕左肩折折分為長兄弟俎也切肺亦祭肺互言之爾無羊滑下尸也豕又祭肺不齋肺不備禮俎司士所設羊鼎西之北俎也豕俎與尸同

釋曰體數奇而侑羊俎四體尊侑而加肫也羊正俎用祭肺豕加俎當用齋肺此豕俎與尸同用雍人羊俎西之北俎

昨俎羊肺一祭肺一載于一俎羊肉滑臂一脊一脅一

腸一胃一齋肺一載于一俎豕脊臂一脊一脅一膚三
齋肺一載于一俎

鄭注胙俎主人俎無體遠下尸也以肺代之肺尊也
加羊肉清而有體崇尸惠亦尊主人臂左臂也侑用
肩主人用臂下之也不言左臂者大夫尊空其文也
降于侑羊體一而增豕膚三有所屈有所申亦所謂
順而撫也胙俎司士所設豕鼎西俎也其清俎與尸
俎同豕俎又與尸豕俎同

釋曰侑無羊肉滑尸酢主人而有之三體降于侑羊
俎一為屈膚三增于主婦俎二則申撫之石反猶拾
也拾取上禮用之

主婦俎羊左臠脊一脅一腸一胃一膚一膾羊肺一載
于一俎

鄭注無豕體而有膚以主人無羊體不敢備也無祭
肺有膾肺亦下侑也祭肺尊言膾羊肺者文承膚下
嫌也膚在羊肺上則羊豕之體名同相亞也其俎司

士所設在魚鼎西者

釋曰豕之膚猶羊之腸胃故膚次腸胃下羊肺上言
羊肺嫌是豕肺臠肺同于侑

司士杜魚亦司士載尸俎五魚橫載之侑主人皆一魚
亦橫載之皆加膾祭于其上

鄭注橫載之者異于牲體彌變于神膾讀如殷尋之
尋劓魚時割其腹以為大臠也可用祭也其俎又與
尸豕俎同

釋曰食生薦神魚俎縮俎右首此橫于俎則進其尾也少儀曰羞濡魚者進尾冬右腴夏右鰭祭膾濡魚此所謂魚清粢或呼孤反覆也

卒升

鄭注卒已也已載尸羊俎

賓長設羊俎于豆南賓降尸升筵自西方坐左執爵右取韭菹換于三豆祭于豆間尸取饗黃宰夫贊者取白黑以授尸尸受兼祭于豆祭

鄭注賓長上賓

雍人授次賓疏匕與俎受于鼎西左手執俎左廉縮之卻
右手執匕枋縮于俎上以東面受于羊鼎之西司馬在
羊鼎之東二手執挑匕枋以挹滑注于疏匕若是者三
鄭注挑謂之歆讀如或舂或枕之枕字或作挑者秦
人語也此匕者皆有淺升狀如飯操挑長枋可以
抒物于器中者注猶寫也

宗寫今注
疏本作瀉

今文挑作枕挹

皆為扱

尸興左執爵右取肺坐祭之祭酒興左執爵

鄭注肺羊祭肺

次賓縮執匕俎以升若是以授尸尸卻手受匕枋坐祭
齊之興覆手以授賓賓亦覆手以受縮匕于俎上以降
鄭注齊滑者明清肉加耳嘗之以其汁尚味

釋曰此匕滑也匕滑無肉肉滑無汁匕滑羊豕皆有
之豕不曰肉滑而曰豕脊曰肉滑者言肉初在滑中
曰脊者明在俎時無汁羊豕互文也魚無匕滑言滑

魚者明魚在滑耳俎降以俟羞羊肉滑

尸席末坐啐酒興坐奠爵拜告旨執爵以興主人北面
于東楹東荅拜

鄭注旨美也拜告酒美荅主人意古文曰東楹之東
司馬羞羊肉滑縮執俎尸坐奠爵興取肺坐絕祭齊之
興反加于俎司馬縮奠俎于羊滑俎南乃載于羊俎卒

載俎縮執以降

案各本作縮執俎以
降唐石經無俎字

鄭注絕祭絕肺末以祭周禮曰絕祭滑使次賓肉使

司馬大夫禮多崇敬也

釋曰正俎皆橫執于席前橫設之加俎皆縮執于席前縮奠之羊清俎清字衍下尸酢主人司馬縮奠清俎于羊俎西

尸坐執爵以興次賓羞羊燔縮執俎縮一燔于俎上鹽在右尸左執爵受燔換于鹽坐振祭瘠之興加于羊俎賓縮執俎以降

鄭注燔炙

釋曰羞羊燔亦當以羊肉滑之俎鄭不言或者曰有
俎與當考主人獻尸之從獻五籩豆一俎二羊匕滑
三羊肉滑四羊燔五侑降于尸無羊滑羊肉滑主人
受酢從獻與尸同五主婦與侑同三尊卑之羞也

尸降筵北面于西楹西坐卒爵執爵以興坐奠爵拜執
爵以興主人北面于東楹東荅拜主人受爵尸升筵立
于筵末主人酌獻侑侑西楹西北面拜受爵主人在其
右北面荅拜

鄭注不洗者俱獻間無事也主人就右者賤不專階
釋曰獻間無他酢酬故不洗也若爵自卑者來獻尊
者則否

主婦薦韭菹醢坐奠于筵前醢在南方婦贊者執二籩
醴蕢以授主婦主婦不興受之奠醴于醢南蕢在醴東
主婦入于房

鄭注醢在南方者立侑為尸使正饌統焉

侑升筵自北方司馬橫執羊俎以升設于豆東侑坐左

執爵右取菹換于醢祭于豆間又取饗黃同祭于豆祭
興左執爵右取肺坐祭之祭酒興左執爵次賓羞羊燔
如尸禮侑降筵自北方北面于西楹西坐卒爵執爵以
興坐奠爵拜主人荅拜

鄭注荅拜拜于侑之右

釋曰侑與主婦無羊肉滑故羊俎皆司馬設之

尸受侑爵降洗侑降立于西階西東而主人降自阼階
辭洗尸坐奠爵于篚興對卒洗主人升尸升自西階主

人拜洗尸北面于西楹西坐奠爵荅拜降盥主人降尸
辭主人對卒盥主人升尸升坐取爵酌

鄭注酌者將酢主人

司宮設席于東序西面主人東楹東北面拜受爵尸西
楹西北面荅拜主婦薦韭菹醯坐奠于筵前菹在北方
婦贊者執二籩麴黃主婦不興受設麴于菹西北黃在
麴西主人升筵自北方主婦入于房

鄭注設籩于菹西北亦辟鉶今文無二籩

案今注疏
本脫此五

字

釋曰菹北當設籩豆于鉶西設籩

長賓設羊俎于豆西主人坐左執爵祭豆籩如侑之祭
興左執爵右取肺坐祭之祭酒興次賓羞匕滑如尸禮
席末坐啐酒執爵以興司馬羞羊肉滑縮執俎主人坐
奠爵于左興受肺坐絕祭臠之興反加于滑俎司馬縮
奠滑俎于羊俎西乃載之卒載縮執虛俎以降

鄭注奠爵于左者神惠變于常也言受肺者明有授

言虛俎者羊消俎訖于此虛不復用

釋曰神惠右不舉變于飲酒也賈氏曰羊俎西之南俎不復用則羞羊燔用北之豕俎

主人坐取爵以興次賓羞燔主人受如尸禮主人降筵自北方北面于阼階上坐卒爵執爵以興坐奠爵拜執爵以興尸西楹西荅拜主人坐奠爵于東序南

鄭注不降奠爵于篚急崇酒

侑升尸侑皆北面于西楹西

鄭注見主人不及位知將與己為禮

主人北面于東楹東再拜崇酒

鄭注崇充也拜謝尸侑以酒薄充滿

尸侑皆荅再拜主人及尸侑皆升就筵司宮取爵于篚以授婦贊者于房東以授主婦

鄭注房東房戶外之東

主婦洗于房中

案今注疏本作洗爵于房中唐石經亦無爵字

出實爵尊南西

面拜獻尸尸拜于筵上受

鄭注尊南西面拜由便也

主婦西面于主人之席北拜送爵入于房取一羊鉶坐奠于韭菹西婦贊者執豕鉶以從主婦不興受設于羊鉶之西興入于房取糗與股脩執以出坐設之糗在黃西脩在白西興立于主人席北西面

鄭注飲酒而有鉶者祭之餘鉶無黍稷殺也糗糗餌也股脩擣肉之脯今文股為斷

尸坐左執爵祭糗脩同祭于豆祭以羊鉶之柶挹羊鉶

遂以挹豕鉶祭于豆祭祭酒次賓羞豕匕清如羊匕清
之禮尸坐啐酒左執爵嘗上鉶執爵以興坐奠爵拜主
婦荅拜執爵以興司士羞豕胥尸坐奠爵興受如羊肉
清之禮坐取爵興次賓羞豕燔尸左執爵受燔如羊燔
之禮坐卒爵拜主婦荅拜受爵酌獻侑侑拜受爵主婦
主人之北西面荅拜

鄭注酌獻者主婦今文無西面

釋曰亞獻之從獻五鉶一糗脩二豕匕清三豕胥四

豕燔五侑無鉶與豕匕滑主人與尸同五

主婦羞糗脩坐奠糗于甗南脩在黃南侑坐左執爵取
糗脩兼祭于豆祭司士縮執豕脣以升侑興取肺坐祭
之司士縮奠豕脣于羊俎之東載于羊俎卒乃縮執俎
以降侑興

鄭注豕脣無滑于侑禮殺

次賓羞豕燔侑受如尸禮坐卒爵拜主婦答拜受爵酌
以致于主人主人筵上拜受爵主婦北面于阼階上答

拜

鄭注主婦易位拜于阼階上辟併敬

主婦設二鉶與糗脩如尸禮主人共祭糗脩祭鉶祭酒
受灰匕滑拜啐酒皆如尸禮嘗鉶不拜

鄭注主人如尸禮尊也其異者不告旨

釋曰尸啐酒不拜而云拜啐酒如尸禮者特牲少牢
饋食禮尸嘗鉶不拜則此尸嘗鉶拜仍為啐酒也或

拜字衍

其受豕脊受豕燔亦如尸禮坐卒爵拜主婦北面答拜
受爵尸降筵受主婦爵以降

鄭注將酢主婦

主人降侑降主婦入于房主人立于洗東北西面侑東
面于西階西南

鄭注俟尸洗

尸易爵于篚盥洗爵

鄭注易爵者男女不相襲爵

主人揖尸侑

鄭注將升

主人升尸升自西階侑從主人北面立于東楹東侑西楹西北面立

鄭注俟尸酌

尸酌主婦出于房西面拜受爵尸北面于侑東荅拜主婦入于房司宮設席于房中南面主婦立于席西

鄭注設席者主婦尊今文曰南面立于席西

婦贊者薦韭菹醢坐奠于筵前菹在西方婦人贊者執
麴蕡以授婦贊者婦贊者不興受設麴于菹西蕡在麴
南

鄭注婦人贊者宗婦之少者

主婦升筵司馬設羊俎于豆南主婦坐左執爵右取菹
換于醢祭于豆間又取麴蕡兼祭于豆祭主婦奠爵興
取肺坐絕祭臍之興加于俎坐拱手祭酒啐酒

鄭注拱手者于悅悅佩巾內則曰婦人亦左佩紛悅

古文扱作說

釋曰主婦羊俎膾肺不祭肺故絕祭扱手

次賓羞羊燔主婦興受燔如主人之禮主婦執爵以出于房西面于主人席北立卒爵執爵拜尸西楹西北面
答拜主婦入立于房尸主人及侑皆就筵

鄭注出房立卒爵宜鄉尊不坐者變于主人也執爵拜變于男子也

上賓洗爵以升酌獻尸尸拜受爵賓西楹西北面拜送

爵尸奠爵于薦左賓降

鄭注上賓賓長也謂之上賓以將獻異之或謂之長

賓奠爵爵止也

釋曰奠于薦左尸後舉之神惠右不舉

主人降洗解

案解今注疏本作爵下兩
實解同唐石經亦竝作解

尸侑降主人奠

爵于篚辭尸對卒洗揖尸升侑不升

鄭注侑不升尸禮益殺不從

主人實解酬尸東楹東北面坐奠爵拜尸西楹西北面

荅拜坐祭遂飲卒爵拜尸荅拜降洗尸降辭主人奠爵于篚對卒洗主人升尸升主人實禪尸拜受爵主人反位荅拜尸北面坐奠爵于薦左

鄭注降洗者主人

釋曰奠于薦左者奠酬不舉也神惠右不舉而此左不舉者賓尸而酬之同于賓客異于神惠

尸侑主人皆升筵乃羞宰夫羞房中之羞于尸侑主人主婦皆右之司士羞庶羞于尸侑主人主婦皆左之

鄭注二羞所以盡歡心房中之羞其籩則糗餌粉飧其豆則醢食糝食庶羞羊臠豕臠皆有載醢房中之羞內羞也內羞在右陰也庶羞在左陽也

釋曰內羞穀物庶羞牲物內羞周禮曰羞籩羞豆臠許堯反

主人降南面拜衆賓于門東三拜衆賓門東北面皆答壹拜

鄭注拜于門東明少南就之也言三拜者衆賓賤旅

之也衆賓壹拜賤也卿大夫尊賓賤純臣也位在門
東古文壹為一

釋曰特牲饋食禮記私臣門東北面

主人洗爵長賓辭主人奠爵于篚興對卒洗升酌獻賓
于西階上長賓升拜受爵主人在其右北面荅拜宰夫
自東房薦脯醢醢在西司士設俎于豆北羊骼一腸一
胃一切肺一膚一

鄭注羊骼羊左骼上賓一體賤也薦與設俎者既則

俟于西序端古文略為略

釋曰俟俟執薦俎從賓降鄉飲酒司正升相旅退立

于序端

賓坐左執爵右取脯換于醢祭之執爵興取肺坐祭之

祭酒遂飲卒爵執爵以興

案各本脫爵字
據唐石經補

坐奠爵拜執

爵以興主人荅拜受爵賓坐取祭以降西面坐委于西

階西南

鄭注成祭于上尊賓也取祭以降反下位也反下位

而在西階西南已獻尊之祭脯肺

釋曰賓自門東而位西階西南猶燕禮士卒于西方已獻而位于東方也衆賓以下則已獻而設薦俎于其位

宰夫執薦以從設于祭東司士執俎以從設于薦東衆賓長升拜受爵主人荅拜坐祭立飲卒爵不拜既爵鄭注既盡也長賓升者以次第升受獻言衆賓長拜則其餘不拜

宰夫贊主人酌若是以辯

鄭注主人每獻一人莫空爵于於宰夫酌授于尊南
今文若為如辯皆為徧

辯受爵其薦脯醢與胾設于其位其位繼上賓而南皆
東面其胾體儀也

鄭注徧獻乃薦畧之亦宰夫薦司士胾用儀者尊體
盡儀度餘骨可用而用之尊者用尊體卑者用卑體
而已亦有切肺膚今文儀皆作臠或為議

乃升長賓主人酌酢于長賓西階上北面賓在左

鄭注言升長賓則有贊者為之主人酌自酢序賓意

賓卑不敢酢

主人坐奠爵拜執爵以興賓荅拜坐祭遂飲卒爵執爵以興坐奠爵拜賓荅拜賓降

鄭注降反位

欽定四庫全書

儀禮集釋卷三十

宋 李如圭 撰

有司徹

宰夫洗解以升主人受酌降酬長賓于西階南北面賓
在左主人坐奠爵拜賓荅拜坐祭遂飲卒爵拜賓荅拜
鄭注宰夫受主人解則受其虛爵奠于篚古文酌為

爵

案今注疏本
脫此五字

釋曰上主人卒爵不言降知虛爵

主人洗賓辭主人坐奠爵于篚對卒洗升酌降復位賓拜受爵主人拜送爵賓西面坐奠爵于薦左

釋曰奠于左者後舉之與不備尸之禮奠酬同神惠右不舉

主人洗升酌獻兄弟于阼階上兄弟之長升拜受爵主人在其右荅拜坐祭立飲不拜既爵皆若是以辯

鄭注兄弟長幼立飲賤不別大夫之賓尊于兄弟宰夫不贊酌者兄弟以親暱來不以官待之

釋曰兄弟雖賤而親故主人親酌之士之兄弟長則賓衆兄弟如衆賓

辯受爵其位在洗東西面北上升受爵其薦胥設于其位

鄭注亦辯獻乃薦既云辯矣復言升受爵者為衆兄弟言也衆兄弟升不拜受爵先著其位于上乃後云薦胥設于其位明位初在是也位不繼于主人而云洗東卑不統于尊此薦胥皆使私人

釋曰賓拜受受爵拜既爵衆賓及長兄弟不拜既爵衆兄弟又不拜受爵故別言升受爵也兄弟已獻不變其位特牲饋食禮兄弟位主人之南者士卑故繼主人言之士冠禮兄弟立于洗東西面北上

其先生之胥折脅一膚一

鄭注先生長兄弟折豕左肩之折

釋曰折分脩俎豕左肩之折

其衆儀也主人洗獻內賓于房中南面拜受爵主人南

面于其右荅拜

鄭注內賓姑姊妹及宗婦獻于主婦之席東主人不
西面尊不與為賓主禮也南面于其右主人之位恒
左人

釋曰特牲主人西面

坐祭立飲不拜既爵若是以辯亦有薦脔

鄭注亦設薦脔于其位特牲饋食禮記曰內賓立于
房中西墉下東面南上宗婦北堂東面北上

主人降洗升獻私人于阼階上拜于下升受主人答其
長拜乃降坐祭立飲不拜既爵若是以辯宰夫贊主人
酌主人于其羣私人不答拜其位繼兄弟之南亦北上
亦有薦胥

鄭注私人家臣也所自謁除也大夫言私人明不純
臣也士言私臣明有君之道北上不敢專其位亦有
薦胥初亦北面在衆賓之後爾言繼者以爵既獻為
文凡獻位定

釋曰大夫曰私人辟君特牲饋食禮私臣門東北面此亦然既獻乃位兄弟之南北上繼于兄弟不敢別自為列凡專其位者雖共方皆別自為上士喪禮朝夕哭大夫即位于門外西面北上兄弟在南南上賓繼之北上是也謁除謂謁于君除其課役

主人就筵

鄭注古文曰升就筵

尸作三獻之爵

鄭注上賓所獻爵不言三獻作之者賓尸而尸益卑
可以自舉

司士羞清魚縮執俎以升尸取膾祭祭之祭酒卒爵

鄭注不羞魚匕清略小味也羊有正俎羞匕清肉清
豕無正俎魚無匕清隆汚之殺

司士縮奠俎于羊俎南橫載于羊俎卒乃縮執俎以降
尸奠爵拜三獻北面荅拜受爵酌獻侑侑拜受三獻北
面荅拜司馬羞清魚一如尸禮卒爵拜三獻荅拜受爵

鄭注司馬羞清魚變于尸

酌致主人主人拜受爵三獻東楹東北面荅拜

鄭注賓拜于東楹東以主人拜受于席就之

釋曰賓之禮當于西階

司士羞一清魚如尸禮卒爵拜三獻荅拜受爵尸降筵

受三獻爵

案今注疏本脫爵字

酌以酢之

鄭注既致主人尸乃酢之遂賓意

三獻西楹西北面拜受爵尸在其右以授之尸升筵南

面荅拜坐祭遂飲卒爵拜尸荅拜執爵以降實于篚二人洗解升實爵西楹西北面東上坐奠爵拜執爵以興尸侑荅拜坐祭遂飲卒爵執以興坐奠爵拜尸侑荅拜皆降

鄭注三獻而禮小成使二人舉爵序殷勤于尸侑洗升酌反位尸侑皆拜受爵舉解者皆拜送侑奠解于右

鄭注奠于右者不舉也神惠右不舉變于飲酒

尸遂執觶以興北面于阼階上酬主人主人在右

鄭注尸拜于阼階上酬禮殺

坐奠爵拜主人主人荅拜不祭立飲卒爵不拜既爵酌
就于阼階上酬主人

鄭注言就者主人立待之

主人拜受

案此下各本有爵
字據唐石經刪

尸拜送

鄭注酬不奠者急酬侑也

尸就筵主人以酬侑于西楹西侑在左坐奠爵拜執爵

興侑荅拜不祭立飲卒爵不拜既爵酌復位侑拜受主人拜送

鄭注言酌復位明授于西階上

主人復筵乃升長賓侑酬之如主人之禮

鄭注遂旅也言升長賓則有贊呼之

至于衆賓遂及兄弟亦如之皆飲于上

鄭注上西階上

遂及私人拜受者升受下飲

鄭注私人之長拜于下升受兄弟之爵下飲之

卒爵升酌以之其位相酬辯

鄭注其位兄弟南位亦拜受拜送升酌由西階

釋曰卒爵受獻惟荅其長拜故受酬亦其長得升受
羣私人以之其位相酬耳

卒飲者實爵于篚

鄭注未受酬者雖無所旅猶飲

乃羞庶羞于賓兄弟內賓及私人

鄭注無房中之羞賤也此羞同時羞則酌房中亦旅其始主婦舉觶于內賓遂及宗婦

釋曰內羞賓文在私人之上私人得酬則內賓亦旅可知

兄弟之後生者舉觶于其長

鄭注後生年少也古文觶皆為爵延熹中詔校書定作觶

洗升酌降北面立于阼階南長在左坐奠爵拜執爵以

興長荅拜

鄭注長在左辟主人

釋曰獻酬之位主人在右

坐祭遂飲卒爵執爵以興坐奠爵拜執爵以興長荅拜
洗升酌降長拜受于其位舉爵者東面荅拜爵止

鄭注拜受荅拜不北面者儻尸禮殺長賓言奠兄弟
言止互相發明相待也

釋曰爵止謂奠之此爵與前主人酬賓之解後竝行

為無算爵特牲饋食禮兄弟弟子舉觶于其長皆北面拜送

賓長獻于尸如初無清爵不止

鄭注賓長者賓之長次上賓者非即上賓也如初如其獻侑酌致主人受尸酢也無清爵不止別不如初者不使兄弟不稱加爵大夫尊也不用觶大夫尊者也

釋曰賓長衆賓之長次上賓者清清魚也特牲饋食

禮長兄弟洗觚為加爵衆賓長亦為加爵此言獻者若三獻之外更容有獻優之也用爵者爵尊于觚賓一人舉爵于尸如初亦遂之于下

鄭注一人次賓長者如初如二人洗解之為也遂之于下者遂及賓兄弟下至于私人是言亦遂之于下

案今

注疏本作故言亦遂之于下也

上言無清爵不止互相發明

釋曰賓長獻一人舉爵皆如初無清爵不止別其異者亦遂之于下明其同者此禮皆如上二人洗解至

卒飲者實爵于篚惟不奠爵于薦耳

賓及兄弟交錯其酬皆遂及私人爵無算

鄭注算數也長賓取解酬兄弟之黨長兄弟取解酬
賓之黨惟已所欲無有次第之數也

尸出侑從主人送于廟門之外拜尸不顧

鄭注拜送之

拜侑與長賓亦如之衆賓從

鄭注從者不拜送也

司士歸尸侑之俎

鄭注尸侑尊送其家

主人退

鄭注反于寢也

有司徹

鄭注徹堂上下之薦俎也外賓尸雖堂上婦人不徹

若不儻尸

案儻各本作甯
據唐石經訂正

鄭注不儻尸謂下大夫也其牲物則同不得備其禮

耳舊說云謂大夫有疾病攝昆弟祭曾子問曰攝主不厭祭不旅不假不綏祭不配布奠于賓賓奠而不舉而此備有似失之矣

釋曰厭祭陽厭也旅旅酬也假假主人也綏祭主人墮減黍稷牢肉以祭也配言某妃配也布奠謂主人酬賓奠解于薦北賓奠謂取解奠于薦南舉舉之行旅酬也此不備之禮亦具有之

則祝侑亦如之

鄭注謂尸七飯時

尸食

鄭注八飯

乃盛俎膾臂肫脰脊橫脊短脅代脅皆牢

鄭注盛者盛于斯俎也此七體羊豕其脊脅皆取一骨也與所舉正脊幹骼凡十矣肩未舉既舉而俎猶有六體焉

釋曰俎有十一體三脊三脅皆二骨既舉而三脊三

金匱要略卷之三十一
脊各遺一骨

魚七

鄭注盛半也魚十有五而俎其一已舉必盛半者魚無足翼于牲象脊脊而已

釋曰特脊脊亦各盛半

腊辯無髀

鄭注亦盛半也所盛者右體也脊屬焉言無髀者云一純而俎嫌有之古文髀作脾

釋曰下云撫于魚腊俎則腊不盡盛亦盛半與魚同
辯者蓋辯盛右體也右脛骨五與脅骨三而八前已
舉右肩今盡盛其餘三脊骨亦盛焉俎所存者左脛
骨與脅骨八个耳上篇云腊一純而俎其兩髀左祝
俎尸俎無髀自明不儻尸之禮髀之所用無文故云
無髀以明之

卒盛乃舉牢肩尸受振祭瘠之佐食受加于所

鄭注卒已

佐食取一俎于堂下以入奠于羊俎東

鄭注不言魚俎東主于尊

釋曰魚在羊東此俎又奠于魚東繼羊言之耳

乃撫于魚腊俎俎釋三个其餘皆取之實于一俎以出
鄭注个猶枚也魚撫四枚腊撫五枚其所釋者腊則
短脅正脅代脅魚三枚而已古文撫為揲

釋曰祝主人之腊用脰體取于所撫則所釋者蓋三
脅骨

祝主人之魚腊取于是

鄭注祝主人主婦俎之魚腊取于此者大夫之禮文待神餘也三者各取一魚其腊主人臂主婦膾祝則酪也與此皆于鼎側更載焉不言主婦未聞

釋曰特牲主人主婦祝皆無魚腊下主婦俎有腊膾此經不言主婦未聞其義或轉寫脫耳

尸不飯告飽主人拜侑不言尸又三飯

鄭注凡十一飯士九飯大夫十一飯其餘十有三飯

十五飯

佐食受牢舉如儻

鄭注舉肺脊

釋曰儻謂上篇及此篇有賓尸之禮者

主人洗酌酌尸賓羞肝皆如儻禮卒爵主人拜祝受尸
爵尸答拜祝酌授尸尸以腊主人亦如儻其綏祭其嘏
亦如儻

鄭注肝牢肝也綏皆當作接接讀為臧其隋之隋古

文為換

其獻視與二佐食其位其薦胾皆如儻主婦其洗獻于尸亦如儻

鄭注自尸侑不飯告飽至此與儻同者在上篇

主婦反取籩于房中執棗糗坐設之棗在稷南糗在棗南
婦贊者執栗脯主婦不興受設之栗在糗東脯在棗東
主婦興反位

鄭注棗饋食之籩糗羞籩之實雜用之下賓尸也栗

脯加籩之實也反位反主人之北拜送爵位

案送人注疏本

訛作還

釋曰籩人掌饋食之籩其實棗臯加籩之實臯脯羞

籩之實糗餌

尸左執爵取棗糗祝取栗脯以授尸尸兼祭于豆祭祭酒啐酒次賓羞牢燔用俎鹽在右尸兼取燔換于鹽振祭濟之祝受加于斝卒爵主婦拜祝受尸爵尸答拜

鄭注自主婦反取籩

案各本脫取字據經大補

至祝受加于斝此

異于儻

祝易爵洗酌授尸尸以醋主婦主婦主人之北拜受爵
尸荅拜主婦反位又拜上佐食綏祭如儻卒爵拜尸荅
拜

鄭注主婦夾爵拜為不儻尸

案儻今注疏
本訛作賓

降崇敬今

大醋曰酌

釋曰士妻獻尸不夾爵內子獻尸夾爵拜下大夫不
儻尸雖與士同仍同內子夾爵拜

主婦獻祝其酌如儻拜坐受爵主婦主人之北答拜

鄭注自尸卒爵至此亦與儻同者亦在上篇

釋曰經無尸卒爵之文鄭注云尸者以經有卒爵之

文多故言尸以別之也

宰夫薦棗糗坐設棗于道西糗在棗南祝左執爵取棗
糗祭于豆祭祭酒啐酒次賓羞燔如尸禮卒爵

鄭注內子不薦遵祝賤使官可也自宰夫薦至賓羞
燔亦異于儻

釋曰特牲主婦設籩

主婦受爵酌獻二佐食亦如饋主婦受爵以入于房賓
長洗爵獻于尸尸拜受賓戶西北答拜爵止

鄭注尸止爵者以三獻禮成欲神惠之均于室中是
以奠而待之

主婦洗于房中酌致于主人主人拜受主婦戶西北面
拜送爵司宮設席

鄭注拜受乃設席變于士也

主婦薦韭菹醢坐設于席前菹在北方婦贊者執棗糗以從主婦不興受設棗于菹北糗在棗西佐食設俎臂脊脅皆牢膚三魚一腊臂

鄭注臂左臂也特牲五體此三者以其牢與腊臂而七牢腊俱臂亦所謂腊如牲體

主人左執爵右取菹換于醢祭于豆間遂祭籩奠爵興取牢肺坐絕祭臠之興加于俎坐扞手祭酒執爵以興坐卒爵拜

鄭注無從者變于士也亦所謂順而撫也

主婦荅拜受爵酌以醋戶內北面拜

鄭注自酢不更爵殺

主人荅拜卒爵拜主人荅拜主婦以爵入于房尸作止爵祭酒卒爵賓拜祝受爵尸荅拜

鄭注作止爵乃祭酒亦變于士自爵止至作止爵亦異于饋

釋曰一止爵順上大夫饋尸之禮也特牲饋食禮再

止爵

祝酌授尸賓拜受爵尸拜送坐祭遂飲卒爵拜尸荅拜獻祝及二佐食洗致爵于主人

鄭注洗致爵者以承佐食賤新之

主人席上拜受爵賓北面荅拜坐祭遂飲卒爵拜賓荅拜受爵酌致爵于主婦主婦北堂司宮設席東面

鄭注北堂中房以北東面者變于士妻賓尸不變者賓尸禮異矣內子東面則宗婦南面西上內賓自若

東面南上

釋曰特牲饋食禮主婦房中南面宗婦北堂東面北上內賓西墉下東面南上宗婦與主婦易處宗婦統于主婦今西上

主婦席北東面拜受爵賓西面答拜

鄭注席北東面者北為下

婦贊者薦韭菹醯醢在南方婦人贊者執棗糗授婦贊者婦贊者不興受設棗于菹南糗在棗東

鄭注婦人替者宗婦之弟婦也今文曰婦也替者執

棗糗授婦替者不興受

案今注疏本脫此十七字

佐食設俎于豆東羊膋豕折羊脊膋祭肺一膚一魚一

腊膋

鄭注豕折豕折骨也不言所折略之特牲主婦敲折豕無脊膋下主人羊豕四體與腊膋而五

釋曰下文絕祭則離肺也曰祭主人以下肺或者因而名之乎特牲禮其用以祭皆離肺

主婦升筵坐左執爵右取菹換于醢祭之祭籩奠爵興
取肺坐絕祭臠之興加于俎坐扠手祭酒執爵興筵北
東面立卒爵拜

鄭注立飲拜既爵者變于大夫

賓荅拜賓受爵易爵于篚洗酌醋于主人戶西北面拜
主人荅拜卒爵拜主人荅拜賓以爵降奠于篚

鄭注自賓獻及二佐食至此亦異于儻

釋曰上篇賓長獻不及佐食此賓長獻節內有十爵

獻尸一主婦致爵于主人二主人酢主婦三尸酢賓
四賓獻祝五獻上佐食六下佐食七賓致爵于主人
八于主婦九賓受主人酢十

乃羞宰夫羞房中之羞司士羞庶羞于尸祝主人主婦
內羞在右庶羞在左主人降拜衆賓洗獻衆賓其薦胾
其位其酬醋皆如儻禮主人洗獻兄弟與內賓與私人
皆如儻禮其位其薦胾皆如儻禮卒乃羞于賓兄弟內
賓及私人辯

鄭注自乃羞至私人之薦胥此亦與饋同者在此篇
不饋尸則祝猶侑耳卒已也乃羞者羞庶羞

釋曰饋尸之禮羞于侑不饋尸則羞于祝賓以下無
內羞

賓長獻于尸尸酌獻祝致酌賓以爵降實于篚

鄭注致謂致爵于主人主婦不言如初者爵不止又
不及佐食

賓兄弟交錯其酬無算爵

鄭注此亦與饋同者在此篇

釋曰持牲饋食禮堂下別尊旅酬無算爵兩有之下大夫不敢同君禮闕旅酬直為無算爵而已兄弟舉觶于其長亦當如饋禮在羞于私人之後賓長加獻之前文不具耳

利洗爵獻于尸尸酌獻祝祝受祭酒啐酒奠之

鄭注利獻不及主人殺也此亦異于饋

釋曰上篇此篇皆無佐食獻

主人出立于阼階上西面祝出立于西階上東面祝告
于主人曰利成祝入主人降立于阼階東西面尸諷祝
前尸從遂出于廟門祝反復位于室中祝命佐食徹尸
俎佐食乃出尸俎于廟門外有司受歸之徹阼薦俎
鄭注自主人出至此與賓雜者也先養徹主人薦俎
者變于士特牲饋食禮曰徹阼俎豆籩設于東序下
乃養如饋

鄭注謂上篇自司宮設對席至上餽興出也古文養

作餒

卒養有司官徹饋饌于室中西北隅南面如饋之設右几扉用席

鄭注官徹饋者司馬司士舉俎宰夫取敦及豆此于尸設改饌當室之白孝子不知神之所在庶其饗之于此所以為厭飫不令婦人改徹饌敦豆變于始也尚使官也佐食不舉羊豕俎親餒尊也扉隱也古丈右作侑扉作第

釋曰主婦獻祝宰夫宰夫多主主婦之事故敦豆宰夫徹之特牲饋食禮佐食徹尸薦俎敦

納一尊于室中

鄭注陽厭殺無玄酒

司官婦祭

鄭注婦豆間之祭舊說云埋之西階東

釋曰神位在西故埋近西階也曾子問凡幣帛皮圭為主命埋之階間

主人出立于阼階上西面祝執其俎以出立于西階上
東面司宮闔牖戶

鄭注閉牖與戶為鬼神或者欲幽闇

祝告利成乃執俎以出于廡門外有司受歸之衆賓出
主人拜送于廡門外乃反

鄭注拜送賓者

衆賓下今注
疏本有也字

亦拜送其長不言長賓

者下大夫無尊賓也

婦人乃徹

鄭注徹祝之薦及房中薦俎不使有司者下上大夫
之禮

徹室中之饌

鄭注有司饌之婦人徹之外內相無禮殺



